



ATASSUT INATSISARTUNI

ATASSUT

UKA 2013/82-1

Siverth K. Heilmann

03.10.2013

**Inuit inissianik pisortat najugaqarfiutaani attartortuusut kisiannili inigisaminnit
anisitaasimasut, allamik sarfalersukkamik, imermut aqquteqartumik aammalu
kiassarneqartumik inissaqartinneqartarnissaat taamatullu ilaqtariit meerartallit
minnerpaamik iganissamut kissartuliornissamullu periarfissaqartinneqartarnissaat pillugu
inatsisitigut illersugaalernissaat siunertaralugu, UPA 14-mut malittarisassiornissamik
Naalakkersuisut peqquneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortaq Juliane Henningsen, Inuit Ataqatigiit)

Inuit Ataqatigiit sinnerlugit Inatsisartuni ilaasortaq Juliane Henningsen matumani
siunnersuuteqarpoq inuit pisortat inissiaataanni attartortittakkani najugaqarsimallutik
attartornissamut isumaqatigiisummik naammassinnissinnaasimanginnertik pissutigalugu
inigisaminnit qimaguttariaqartartut inatsisitigut illersugaalernissaat anguniarlugu
malittarisassaliortoqassasoq.

Ilungersunartuuvoq inuit, pingaartumillu ilaqtariit meerartallit inigisaminnit
anisitaasariaqartarerat, taamaammat ATASSUT-mut pingaarnersaavoq inissianik attartortut
attartornermut isumaqatigiisummik arlaannik pissuteqarlutik naammassinnissinnaajunnaartut
inigisaaniit qimagutsittariaqalertarerat pinaveersimatissallugu.

Attartornermut isumaqatigiisummik naammassinnissinnaajunnaarneq arlalinnik
pissuteqarsinnaavoq, ilaasa akiligassatik tunulliullugit aningaasat allamut atorsinnaasarpaat, ilaasali
amma pissutsit namminneq aquassinnaajunnaakkatik pissutigalugit akiligassaminnik
kinguaattoortarput, assersuutigalugu napparsimalernikkut, pilersueqatigisap toqukkut
qimagunneratigut, suliffissaaruteriataarnikkut, imaluunniit isertitat aningaasartuutilu



ATASSUT INATSISARTUNI

naligiikkunnaarnerisigut akiligassatigut kinguaattoortoqarsinnaasarpooq
anigoruminaatsinneqartumik.

Pingaartumik kingulliit illersorneqarnissaat pillugu ATASSUT-mit siunnersuutiginikuuarput inigisamut akilersuinermi kinguaattoorluni akitsoqalersimagaanni isumaqatigiissuteqarnikkut naafferartumik akilersuisoqarsinnaalissasoq, tamannalu qujanartumik iluatsinnikuuvooq, neriuutigilluinnarpullu inissianik attartortut kinguaattoornissartik avaqqussinnaajunnaaraangamikku periarfissaq atorluarniartarsimassagaat, taamaalillutillu inigisaminniiginnarnissaq qulakkeerniartarsimassagaat.

Taamatuttaaq aaqqissuusineq ineqartut pisortanit aningaasarsiaqartut, tassa utoqqalinersiallit, siusinaartumik utoqqalinersiallit, suliffissaaleqillutik pisartagaqartut inigisaminnut namminneq akiliisinneqartalernikuunerat inigisaminnit anisitaasut amerlinerinik kinguneqartoq pillugu nalilersueqqittoqartariaqartoq ATASSUT-mit isumaqarpugut, matumanilu Naalakkersuisunut kaammattuitigissavarput Kommunit piaartumik attavigineqassasut aaqqissuussineq tamanut pitsaanerpaasoq nassaarineqarsinnaaqqullugu.

Soorlu tusaaneqarsinnaasoq, uagutsinnut pingarnerpaavoq sapinggisamik anisitaasoqannginnissaa anguniarneqartariaqartoq, pingaartumik namminneq iliuuseqarfingisinnaanngisaminnik pissuteqartumik akilersuinikkut kinguaattoorsimasut eqqarsaatigalugit.

Taamaattorli piviusuuvoq – ullumikkut innuttaasut ikigisassaanngitsut inigisaminnit qimagutsinneqarsimasut inissiani utaqqiisaasumik najugaqartinneqartarput, allaat inigineqarnissaminnut naleqqutinngitsuni, tamannali inuunerminni ingerlariaqqinnissaannut kaammattutaanngilluinnarpoq piaartumillu aaqqiivigineqartariaqarluni, pingaartumik ilaqtariit meerartallit illersorneqarsinnaasumik initaaqqinnissamik tungaanut utaqqiisaasumik inigisassaannik qulakkeerunneqartariaqarput.

Taamaammat Inatsisartuni ilaasortaq Juliane Henningsen isumaqatigilluinnarpalput, angerlarsimaffeqanngitsut inatsisitigut illersugaasariaqarput, pingaartumik meerartallit.



ATASSUT INATSISARTUNI

Taamatut oqaaseqarluta ATASSUT-mit inassutigissavarput siunnersuut ataatsimiitaliamut susassaqartumut suliassanngortinnejassasoq, tamatumalu saniatigut Naalakkersuisunut kaammattuitigissavarput inissiat attartortittakkat nagugaqarfingissagaanni pisussaaffit periarfissallu pillugit paasisitsiniaanerit annertusarneqarnissaat sulissutigineqassasoq.